

**Ineqarnerup tassungalu ilanngunneqarsinnaasut ilanngullugit
aaqqissuuteqqinnissaannik pisariaqartitsineq pillugu apeqquteqaat aallaavigalugu
Inatsisartut oqallinnissaannik siunnersuut
(Partii Naleqqap Inatsisartuni ilaasortaaitai)**

Akissuteqaat

(Ineqarnermut Attaveqaqatigiinnermullu Naalakkersuisoq)

Inissianut Tamarmiusunut Pilersaarut Naalakkersuisut 2020-mi februaarip arferngani akueraat, tassanilu siunissami pisortat inissiaataasa siunissaannut tunngavissat anguniagassallu aalajangersarneqarput aamma ineqarnermut akiliutit imminnut nammassinnaasut pillugit najoqutassianik misissuinissaq ineriartortitsinissarlu, taamaalillunilu siunissami inissiat aserfallatsaalineqarnissaannik, peqqinnartuunissaannik naleqquttuunissaannillu qulakkeerinnissamik siunnerfigineqarpoq, tamatumalu peqatigisaanik ineqarnermut tapiissutinik iluarsiinikkut inoqutigiit akissaatikitsut akiliisinnaanerilu eqqarsaatigineqassapput.

Suliniutit aallartinneqartut siunissamut ungasissumut suliassa qarfiillu akimorlugit suleqatigiinnermik pisariaqartitsiviupput qulakkiissavaallu inuiaqatigiinnut iluaqtissat. Inissianik ingerlaavartumik iluarsaassinerit najukkani sulisartut pisinnaasaannik annertusaanermik nassataqartussaammat, aammalu ilinniarnermi inissamik amerlanerusunik pilersitsinissamut periarfissiisussaammat.

Ineqarnermi aaqqissuusseqqinnerit ukiuni arlalinni ingerlanneqarput aamma Inissianut Tamarmiusunut Pilersaarut aaqqissuusseqqinnermut tassunga nangissutaavoq. Ukiorpassuarni inissiat nungullartinnaveersaarnissaannut ajoqusernaveersaarnissaannullu taarsiullugu tassangaannartumik pisariaqalersunik inissianik iluarsaassineq kisimik sularineqartarsimapput. Tamatuma kingunerisaanik nunap karsia annertuumik sunnuteqarfigineqarpoq. Aningaasaliissutit nutaanik inissialiornermut atornagit aningaasaliissutinik tassangaannartumik aserfallatsaaliuinnermut atuisoqartarpoq

Taamaattumik siunnersuutip, Partii Naleqqap Inatsisartuni ilaasortaaitaanit nassiunneqartup immikkoortuisa pingaarnersaat toqqaannartumik maanna suliarni ingerlanneqartumiittutut naliliiffigineqarput.

Kiisalu Partii Naleqqamit illuliortiternermut sanaartornermullu akit qaffasinneri tikkuarneqarput. Pisortat sanaartugassaataannut, pingaartumik illoqarfanni annerni neqerooruteqartitsisarnerni piumasaqartarnenilu unammilligassat annertusiartorneranni illuliornermut sanaartornermullu akit qaffannerinik kinguneqarpoq kisiannili tamanna

illuliortiternermi sanaartormilu piginnaasanik amigaateqarnermut attuumassuteqarnera isiginiarneqassaaq.

Oqallilluarnissatsinnut qilanaarpunga.